

平度志要

六
兵制

兵制

謹案兵防所以衛民慎固封守莫重於此平度居齊東偏廣袤五百餘里東北羣山拱峙毗連掖縣招遠萊陽易藏暴客西南平坦大野雖有東姑西膠環抱如帶而無險可據防守為難隋唐以上兵制無可考宋設廂兵騎名威邊軍步名壯武軍安東軍寧濟軍壯城軍壯城專治城隍不應他役熙寧中名額猥多自騎射至牢城名凡二百二十三軍營器甲官司徭役皆應之非止戰守已也明設指揮其初立法未嘗不善故州地有轄於鼇山衛者有轄於大嵩衛者有轄於浮山所者其後承平日久惟事圈占民田呼盧喝雉不知技擊故唐賽兒劉六劉七孔有德李九成之亂屠城戕官塗炭斯民慘不可言及崇禎十五年大兵掃除遂易明祚歷年二百四經大變兒戲武嬉誰職其咎

國朝裁撤指揮設平度州汛千總一員屬登州鎮即墨營前志額設馬兵二十二名守兵五十六名今閱平度汛說圖冊額設馬兵十名守兵三十八名實在存汛馬兵六名守兵十三名設遇狡焉思逞之輩議戰議守深可慮矣西北路烟墩二一為灰埠墩距汛七十里東至萊州營英村墩二十里西至本汛獨埠墩二十里一為獨埠墩距汛九十里西至萊州營昌邑汛卜莊墩二十里北路撥三一為新河撥距汛九十里西至昌邑汛卜莊墩十里一為二十里舖撥距汛二十里北至高望山撥二十五里一為高望山撥北

至萊州營馬驛撥三十五里南路撥三一為何家店撥距汛二十里南至蘭堤撥三十里一為蘭堤撥南至吳家口撥三十里一為吳家口撥南至膠州營馬店撥二十里東路撥三一為白沙撥距汛二十里東南至金錢山撥二十里一為金錢山撥東南至冷郭莊撥二十里一為冷郭莊撥東南至本營即墨縣劉郭莊撥二十里其實新河乃西北路白沙金錢山冷郭莊皆東南路也州署額設民壯二十八名弓箭手十名烏鎗手十八名遞鋪二十四座鋪司二十四名鋪兵三十四名在城總鋪一鋪司一鋪兵五東路鋪五東十里鋪麻蘭鋪六曲鋪古縣鋪梁家莊鋪南路鋪四鳳臺鋪馬邱鋪蘭堤鋪雙邱鋪北路鋪四石橋鋪鄭胡鋪蘇村鋪高望山鋪西南路鋪四硝場鋪邱西鋪紀家鋪亭口鋪西北路鋪四周家莊鋪大場口鋪張舍鋪房家鋪此五路二十一鋪皆鋪司一鋪兵一又西北路鋪二灰埠鋪三埠鋪此二鋪皆鋪司一鋪兵四州驛馬五匹灰埠驛馬九匹此文署武汛墩鋪之坐落郵駟之里數兵丁之駐守之形勢也若夫沿海口岸州境所無至於河東北則尤在萬山之中東則尤居內而姑居外東南則尤入於沽合流而南下開助水河南而迤西入於膠膠流至於西南折而北至掖入於海自山外一帶環抱四百餘里皆河岸寬平有土有沙無堤無堰此又地輿之形勢也當咸豐十一年秋知州福紹甫莅州任聞有礦賊二千餘衆據舊店地方拒捕開礦福紹飛騎前往擒捉當即

潰散而礦洞尚未填平突有探役飛報捻幅不知確數自高密一路蜂擁而來福紹星馳回城相機堵勦此八月八日事也歷勘膠萊河繇互二百餘里岸低流狹且有無水之處兵單役寡不足堵禦惟有堅壁清野羽書告急以保孤城賊已過河分股焚擾南鄉數百村民望城奔投此九日十日事也城樓見馬賊東西馳突先已屯固西南兩門惟留東門收納難民四路偵探此十一十二十三日事也馬賊萬餘騎步賊無數攻圍城池關廂民居焚燬過半未申之間蟻附城下放箭開礮擊斃二十餘賊薄暮賊退火燄蔽天掩奪月光城北之民皆棲於山東則古縣麻蘭東南則冷郭莊南則蘭堤蓼蘭西南則白埠南莊西則馬郭莊古莊戴家埠張郭莊門村西北則昌里長樂城子皆環村築外衛獨白埠開礮轟斃多賊賊懼而退凡築外衛者皆無患古縣雖築外衛而民心驚恐不知衛之足恃舍而不守皆奔上漢膠東諸王陵寢以瞭望賊環衛潛窺懼有伏不敢驟入既知空無人乃擁而進從容飽掠去諸陵上民雖失財物猶幸人無傷也蘭堤則賊脅一民至衛下使呼以贖命索馬與之索銀與之索鴉片不足脅以來城買而與之城不應礮擊而退賊至山下者民以石擊之賊相戒不敢犯惟東南金錢山部婁耳且無石賊馳而上婦孺投澗而死者枕藉也餘則斬刈無噍類王繼宗單耀宗孫雨金之三人皆居后疇素以勇聞白埠人以其勇又居相近也邀入衛三人不往也在野以車衛

樹鑼於上齒外向老幼婦女衣食貲財盡入車衛中三人者率其諸弟子執戈環衛而守之與賊戰各手刃一二百賊賊怒甚其弟子盡沒殺竟日三人力不支賊以大旗蒙其面皆死車衛中無逃者此十四日事也賊游弋城外鼓樂烟火日夜刺耳目此十五十六日事也城中晝夜協防民無懈志賊知不可攻分撲黃縣濰縣而去此十七十八十九日事也撲濰縣者竄至膠萊河昌邑在籍辦團提督傅振邦扼河截回昌邑何幸哉此二十二十一日事也扶老攜幼棲泊城中二十萬衆直無容足之地嗷嗷待哺嬰孺僵餓時有寧陽縣教諭許珣在籍協同守城聞福紹請急籌欸首先出粟助賑民賴以甦平度為登萊門戶往來肆擾州乃必經之地其飽掠而歸沂與淮徐也又必由州而過故前小有殲斃不敢再近城廂而蹂躪徧於四境幾而兩月是以四路確探賊踪稍遠輒放民穫豆種麥運納芻粟一聞賊警飛速入城官民一心謀食而守而汎弁潛匿樂戶中樂戶羣詬之不聞也賊雖不敢近城而鄉民避賊者又無隙地可容露宿關廂日寒而慄福紹商之大衆協修外衛剋期興工畚鍤雲集此八月九月間事也時傅振邦扼在河西賊皆不得西竄盤踞四鄉情形危急文報不通福紹選敢死士分投羽書其略云前因逆匪屯聚卑境四鄉焚掠殆盡當經屢次哀請設法救援在案議守議賑一月有餘筋疲力盡實難支持又探得膠州圍困城池已十餘日該州城內井水苦鹹止用浣衣

滌器惟食城外膠河之水自被圍以來不能出汲勉食苦水近已
井竭加以米鹽俱盡人皆槁餓若再不發重兵救援被圍日久勢
將不攻而自潰卑州相去伊邇脣亡齒寒固屬可慮更恐逆匪退
有所守益肆猖獗蠶食而進則省東一帶皆不能安枕矣救膠州即
救平度救省東一帶也是誠有關大局者也除卑職竭盡血誠嚴密保
守外合由六百里稟請大人查核俯賜先急其所最急速發重兵
前往膠州救援以保危城而拯民命云云此九月十三日事也旋
有逆賊數萬自濰縣固堤而來折而西南竄向高密此十四十五
十六日事也又有黑旗捻逆自掖縣而來南撲膠州膠州圍解後
聞逃回難民詳訴黑捻尤暴諸捻畏之是以圍膠逆捻風聞而逃
若再遲一二日膠即破矣以城內苦井已竭也此十七至二十日
事也膠圍解高密圍亦解而細探州境遺捻尚不下四五萬距城
俱三十餘里外蓋河西有傅振邦鄉團再西有僧邸大兵計自八
月十五日起每日告急甚則日至二三請兵救援盼至卅月有餘
未見一騎東來僅恃丁壯不足百名新募鄉勇二千名未嫻技擊
賴福紹激厲慷慨共明大義故能舍死忘生有進無退間與賊戰
每有斬獲未嘗失律然惟以守城為本不敢窮追城兵不能遠出
救師不聞西來捻逆飽掠急欲南返而歸路多阻畏首畏尾盤避
州境焚燬殆盡百姓不堪其苦爭思一戰交敵彩村不分勝負既
而賊勢佯北民不知詐窮追失利賊追我民幾至城下此二十八

日事也是夜城上瞭望四面不見火光黎明探回不見賊踪繼而各縣分探皆云二十九日各縣肅清福紹於南關佛寺祭陣亡士民素服哭臨三日又勸急修外衛以為思患預防之計高深均一丈五尺十月十五日告成我

朝定鼎二百餘年沿海蒼黎安居樂業民不知兵猝經捻逆逃避無所焚掠割屠滿目瘡痍尚未甦息同治六年五月既望方議割麥突於十七日灰埠飛報賊入青石關關廂而外幸有外衛四鄉村莊亦多有衛牆藉以堵禦十八九日烟火塵氛自西潮湧頃刻之間徧地皆賊視十一年尤多尤兇蓋前止捻逆此兼有髮逆任豬賴勿泐也旋見總兵王心安率師東追六月二十七日巡撫丁寶楨師次西關七月初一日西來各營兵會於膠河西岸築牆禦賊初三日布政使潘鼎新至旋即西行初六日巡撫帥師入膠州由膠州入即墨之勞山初十日提督劉銘傳師次楊家圈王心安晝夜逐賊自州而東以及登州全屬往來奔馳刻無停趾所部將士兩足皆腫自膠萊河東廣袤二千餘里無地無賊十六日知州陳昆蘭生擒賊目趙闖才訊供無處得食馬步全隊攻撲膠河大兵分段堵住仍回古縣定於十九日合隊再攻十八日擒賊目陳震燦訊供全隊回高望山餘與趙闖才同二十二日據逃回難民赴州稟稱賊於十九日夜由掖縣海倉偷渡過河河東州縣一律肅清賊所急者財物而尤急者糧自前經捻逆民知衛牆之足恃多議

修築芻粟皆實於中賊來無所得食又不得渡河而西餓而搜山
非暗自仄徑入則潛自後路上一山忽破衆山皆頽山棲之民於
此獨苦豈有數存其間乎保身家者慎不可顧此而失彼也

